

每週經課朗誦經文(巴克禮漢羅/教羅)2014/10/05

共同經課 - 1 出埃及記二十章一節~四節，七節~九節，十二節~二十節

1 上帝吩咐 chiah-ê 一切 ê 話講；2 我是耶和華，你 ê 上帝，bat choā 你 tù 埃及地，tùi 做奴才 ê 家，出來 ê。3 我以外，你 m̄-thang 有別個上帝(=神明)。4 M̄-thang 為 tiòh 家已雕刻偶像，不論天頂、地上，kap 地下水內所有 ê 物，lóng m̄-thang 做 in ê 像；7 M̄-thang lām-sám 稱耶和華你 ê 上帝 ê 名；因為 lām-sám 稱伊 ê 名 ê 人，耶和華的確無掠伊做無罪。8 Tiòh 記得安歇日，守伊做聖；9 六日內應該 tiòh 磨，做你一切 ê 工；12 Tiòh 孝敬你 ê 老父，你 ê 老母，hō 你 ê 日子 tī 耶和華你 ê 上帝所賞賜你 ê 地，得 tiòh 久長。13 M̄-thang 害死人。14 M̄-thang 行姦淫。15 M̄-thang 偷 thèh。16 M̄-thang 做假 ê 干證，陷害你 ê 厝邊。17 M̄-thang 貪你 ê 厝邊 ê 厝，也 m̄-thang 貪你 ê 厝邊 ê bó、奴僕、奴婢、牛、驢，以及你 ê 厝邊一切所有 ê。18 眾百姓看見雷 tân、sih-nà、哨角 ê 聲，koh 山頂出煙，百姓一下看見，就 ngiauh-ngiauh-chhoah，遠遠 khiā-teh；19 對摩西講：求你 kap 阮講：阮 beh 聽；m̄-thang 上帝 kap 阮講：驚了阮會死。20 摩西對百姓講：m̄免驚；因為上帝降臨是 beh 試驗 lín koh hō lín 時常敬畏伊，免得 lín 犯罪。

共同經課 - 2 詩篇十九篇

1 大衛 ê 詩；交 hō 樂官。1) Chiah-ê 天講起上帝 ê 榮光，穹蒼報揚伊 ê 手所做 ê。2 Chit 日 tùi hit 日發出言語，Chit 暝 tùi hit 暝傳出知識。3 無言無語；In ê 聲無 thang 聽見。4 In ê 準繩遍 tī 天下，In ê 言語到 tī 地極。上帝 tī in 中間為 tiòh 日頭安置帳房。5 日頭親像新 kiáⁿ 婿出伊 ê 房，亦親像猛勇 ê 人歡喜走伊 ê 路。6 伊 tùi 天 ê chit-pêng 出，Sèh 到天 ê hit-pêng；無一項物 khng 密，無得 tiòh 伊 ê 熱氣。7 耶和華 ê 律法齊全，能 hō 人 ê 心神活起來；耶和華 ê 干證確實，能 hō 人有智慧。8 耶和華 ê 教示正直，能 hō 人 ê 心歡喜；耶和華 ê 命令清潔，能 hō 人 ê 目矚光明。9 敬畏耶和華 ê 道理是清氣，永遠存在；耶和華 ê 判斷真實，一概是公義。10 比金，比 choē-choē 好金，khah thang 欣慕；比蜜，比蜂房滴落來 ê 蜜 khah 甜。11 Koh 你 ê 奴僕 tùi chiah-ê 受警戒；守 chiah-ê 有大賞賜。12 Chī-chūi 會知伊 ê 失錯 ah？求你除去我暗靜 ê 過失。13 求你阻止你 ê 奴僕，無故意犯罪；M̄准 hit-ê 罪惡管轄我；我就完全，免犯大罪。14 耶和華我 ê 石磐，救贖我 ê 主 ah；願我 ê 嘴所講 ê，心所想 ê，tī 你 ê 面前得 tiòh 接納。

共同經課 - 3 腓立比書三章四 b 節~十四節

4 若別人掠做有 thang oá 靠肉體，我就 koh-khah 有。5 我第八日受割禮，是以色列族 ê 人，便雅憫 ê 支派，是希伯來人所生 ê 希伯來人，照律法就是法利賽人，6 照熱心就是 khún-tiòk 教會，照 tī 律法 ê 義就是無縫 thang 嫌。7 但是平素做我 ê 利益 ê，我為 tiòh 基督已經看伊做損害。8 M̄-nā án-ni，我真正看萬事做損害，因為我掠 bat 我 ê 主基督耶穌做第一好；我為 tiòh 伊 bat 損失一切，也看做糞埽，是 ài 得 tiòh 基督，9 來長長 tiàm-tī 伊，m̄是有家已 ê 義，出 tī 律法 ê，就是有 tùi 信基督 ê 義，上帝為 tiòh 信所賞賜 ê；10 hō 我 bat 伊，kap 伊 koh 活 ê 權能，以及有份伊 ê 受苦，來學伊 ê 死，11 看會得 thang 到 tī hit-ê tùi 死人中 ê koh 活。12 m̄是講我已經得 tiòh，á 是已經完全；獨獨走進前，看 oē-thang 得 tiòh 基督耶穌 ê 所以得 tiòh 我 ê。13 兄弟 ah，我無掠家已做已經得 tiòh；獨獨專務一項，就是 boē 記得後面 ê 事，致意頭前 ê 事，14 ñg 所插 ê 標來走，到得 tiòh 上帝 tī 基督耶穌，tùi 頂面召咱 ê 賞。

共同經課 - 4 馬太福音二十一章三十三節~四十六節

33 Koh 聽一個譬喻：有一個家主，知一園葡萄，用籬笆圍伊，內面開酒窟，起一個守更樓，租 hō 佃戶，就去別所在。34 收果子 ê 時 beh 到，就差伊 ê 奴僕就近佃戶，收伊 ê 果子。35 佃戶掠伊 ê 奴僕，一個 phah，一個 thài，一個用石頭 tìm。36 Koh 差別個奴僕，比前 khah choē；in 猶原 án-ni 款待 in。37 後來差伊 ê Kiáⁿ 就近 in，想講，In beh 尊敬我 ê Kiáⁿ。38 若是佃戶看見 hit-ê Kiáⁿ，就 saⁿ-kap 講，chit-ê 是伊 ê 後嗣；來，kā 伊 thài 死，thang 得伊 ê 業。39 就掠伊，chhia 伊出園外，害死伊。40 Taⁿ 園主若到，beh 怎樣來辦 chiah-ê 佃戶？41 In kā 伊講，伊 beh 用惡報來滅 chiah-ê 惡人；將葡萄園租別個佃戶，就是照時納果子 ê。42 耶穌對 in 講，經裡所記載，師傅所去 sak ê 石，成做厝角頭 ê 石；這是主所成 ê，咱 ê 目矚看做奇怪，lín kiám bē 讀 mah？43 所以我 kā lín 講，上帝 ê 國 beh tùi lín 搶去，來賞賜結伊 ê 果子 ê 百姓。44 Koh 跋倒(poah-tó)tī chit 塊石頂 ê teh-beh 破 kô-kô；hō chit 塊石 teh tī 伊頂面 ê beh 幼 boah-boah。45 Chiah-ê 祭司頭 kap 法利賽人聽見伊 ê 譬喻，知伊所講 ê 是指 in。46 就 ài beh 掠伊，若是驚眾人；因為眾人掠伊做先知。